



Broj:05-07-26-4917/14  
Sarajevo,28.05.2014.godine

PRIMLJENO: 03-06-2014			
Organizaciona jedinica	Klasifikaciona oznaka	Redni broj	Broj priloga
02	506	16	37/14

**PARLAMENTARNA SKUPŠTINA BOSNE I HERCEGOVINE**  
**- DOM NARODA -**  
**n/r g-đa Nermina Kapetanović, izaslanica**  
**SARAJEVO**

Na 37. sjednici Doma naroda Parlamentarne skupštine Bosne i Hercegovine, održanoj 29.04.1014. godine, izaslanica Nermina Kapetanović postavila je Ministarstvu pravde Bosne i Hercegovine sljedeće pitanje:

„Šta je poduzelo Ministarstvo pravde BiH, po pitanju rješavanja sve izraženijeg problema cyber kriminala i dječije pornografije u BiH?“

Na postavljeno pitanje Ministarstvo pravde Bosne i Hercegovine daje sljedeći,

**ODGOVOR**

Dana 09.02.2005. godine Bosna i Hercegovina je potpisala Konvenciju o cyber kriminalu, te istu ratifikovala 2006. godine, čime je ispunila jednu od obaveza ratifikovanja Konvencija Vijeća Evrope u oblasti krivičnog zakonodavstva.

Konvencija o cyber kriminalu (ETS 185, Vijeće Evrope, 2001) u članu 9. sadrži konkretnu odredbu koja kriminalizira dječiju pornografiju kad se koristi preko kompjuterskog sistema. Konvencija sadrži definiciju dječije pornografije i poziva države ugovornice da kriminaliziraju proizvodnju, nuđenje/činjenje dostupnim, distribuciju/prenošenje, pribavljanje i posjedovanje dječije pornografije.

Osnovni oblik zaštite od cyber kriminala kao organizirane kriminalne aktivnosti sadržan je u okviru krivičnih zakona koji se primjenjuju u Bosni i Hercegovini. Krivična djela koja se direktno odnose na „dječiju pornografiju“ uređena su entitetskim krivičnim zakonodavstvom. (krivični zakoni FBiH, RS-a i Brčko distrikta BiH). Većina načina činjenja krivičnih djela koji se smatraju „dječijom pornografijom“ obuhvaćena su u krivičnom zakonodavstvu BiH, s tim da se i dalje radi na tome da se krivične norme u entitetskim zakona hramoniziraju, kako bi iste u potpunosti inkorporirale Konvenciju VE o cyber kriminalu, kao i Fakultativni protokol uz Konvenciju Ujedinjenih naroda o pravima djeteta, o prodaji djece, dječijoj prostituciji i dječijoj pornografiji.

Kada je u pitanju procesno zakonodavstvo, procesuiranje izvršioca ovih krivičnih djela se vrši u entitetima po entitetskim zakonima o krivičnom postupku koji u suštini ovu materiju reguliraju na identičan način. Kako su i kod ovog krivičnog djela žrtve djeca i maloljetnici, na njih se primjenjuju posebne odredbe iz zakona o krivičnom postupku u Bosni i Hercegovini (u toku krivičnog postupka štite se interesi djece i maloljetnih lica u skladu s odredbama Protokola i odnose se na samo vođenje postupka, te zaštitu maloljetnika i djece).

Vijeće Evrope i Evropska unija, je pokrenulo Projekat pod nazivom „Jačanje saradnje u borbi protiv cyber kriminala za zemlje jugoistočne Evrope i Tursku“ koji je službeno započeo 16.02.2011. godine. Osnovni cilj Projekta bio je jačanje kapaciteta zemalja jugoistočne Evrope u borbi protiv cyber kriminala, kao i jačanje međusobne saradnje na ovom polju između zemalja članica Projekta, a u kontekstu provedbe

Konvencije Vijeća Evrope o cyber kriminalu. Projekat je obuhvatio osam oblasti u okviru kojih je proveden znatan broj aktivnosti. Aktivnosti na koordiniranju provedbe Projekta za Bosnu i Hercegovinu provodilo je Ministarstvo sigurnosti Bosne i Hercegovine zajedno sa predstavnicima Ministarstva pravde Bosne i Hercegovine i Tužilaštva Bosne i Hercegovine uz učešće predstavnika nadležnih institucija i agencija iz Bosne i Hercegovine. Ključni rezultati u provedbi ovog Projekta su podizanje svijesti o opasnosti i potrebi borbe protiv cyber kriminala, aktivnosti obučavanja predstavnika nadležnih institucija i agencija u borbi protiv cyber kriminala, uspostavljanje zajedničkih mreža, unaprijeđenje regionalne i međunarodne saradnje, provedba zakonskih reformi, jačanje institucionalnih kapaciteta, izrada smjernica za saradnju sa privatnim sektorom, prevashodno pružateljima internet usluga, itd.

U okviru provedbe Projekta, na regionalnoj konferenciji o strateškim prioritetima, održanoj u Dubrovniku u periodu 13.-15.02.2013. godine, prihvaćena je i Zajednička deklaracija ministara i visokih dužnosnika o strateškim prioritetima u borbi protiv cyber kriminala. Bosnu i Hercegovinu su na spomenutoj Konferenciji predstavljali ministar pravde Bosne i Hercegovine i zamjenik ministra sigurnosti Bosne i Hercegovine. Projekat je službeno okončan 30.04.2013. godine. Informacija u vezi Projekta Vijeća Evrope i Europske unije u borbi protiv cyber kriminala za zemlje jugoistočne Evrope i Tursku (2011-2013) usvojena je na Vijeću ministara BiH na 75. sjednici, održanoj 11.12.2013. godine, kojom se „*Obavezuju nadležne institucije i agencije u Bosni i Hercegovini da pokrenu aktivnosti na realizaciji preporuka Vijeća Evrope o ocjeni stanja u oblasti borbe protiv cyber kriminala u zemljama Jugoistočne Evrope, te provedbi Zajedničke deklaracije o strateškim prioritetima u borbi protiv cyber kriminala, prihvaćene od strane ministara i visokih zvaničnika zemalja jugoistočne Evrope 15.02.2013. godine na regionalnoj konferenciji o strateškim prioritetima u borbi protiv cyber kriminala.*“

Ministarstvo sigurnosti i Ministarstvo pravde u saradnji sa svim relevantnim institucijama u BiH izradilo je *Akcijski plan za zaštitu djece i sprečavanje nasilja nad djecom putem informacijsko-komunikacijskih tehnologija u Bosni i Hercegovini do 2015. godine*, koji je Vijeće ministara Bosne i Hercegovine usvojilo na 89. sjednici održanoj 04.04.2014.godine. Ovaj Akcijski plan je fokusiran na poboljšanje sistema zaštite od dječije pornografije i pedofilije. Radi se o više od 40 aktivnosti koje će nadležna tijela u BiH provesti do kraja 2015. godine radi osiguranja efikasnog mehanizma zaštite od dječije pornografije i drugih oblika seksualnog iskorištavanja te zlouporabe djece putem informacijsko-komunikacijskih tehnologija. Akcijski plan je sačinjen u skladu sa Strategijom suprotstavljanja trgovini ljudima u Bosni i Hercegovini (2013. – 2015.), koju je Vijeće ministara BiH usvojilo u martu prošle godine. Planom je definisano donošenje izmjena i dopuna postojećih zakona, te usklađivanje podzakonskih akata, kao i unapređenje institucionalnih kapaciteta i saradnje u ovoj oblasti s međunarodnim tijelima.

Dakle, Ministarstvo pravde Bosne i Hercegovine, u skladu sa svojim nadležnostima aktivno učestvuje, te podržava aktivnosti vezane za borbu protiv cyber kriminala, posebno dječije pornografije, koje mogu doprinijeti povećanju stepena sveukupne zaštite od cyber kriminala.

S poštovanjem,

 **MINISTAR**  
*Bariša Čolak*  
